

HAU NIA OPORTUNIDADE ATU SERVISU HO FETO HUSI TASI-BALU IHA TIMOR-LESTE

Joana Belo da Costa
Mape, Lolotoe, Timor-Leste

Hau nia naran Joana Belo da Costa. Hau hela hamutuk ho hau nia inan-aman sira ho familia nain neen iha aldeia Mapem Lolotoe, Timor-Leste. Hau iha alin nain lima no biin ida, hau nia alin sira sei eskola hela no sira iha oportunidade hakarak tebes buat barak mak atu aprende husi edukasaun eskola. Alin sira no hau hakarak mos atu kontinua ami nia edukasaun eskola ba oin nafatin, maibe defisi tebes ba inan-aman sira, tamba sira laiha servisu atu hetan orsamentu ruma hodi suporta oan sira ba eskola. Maibe kona ba hau nia edukasaun eskola hau husu ba hau nia inan-aman atu suporta nafatin hau too iha SMA, maske orsamentu la too, hau mos obriga hau nia-an too duni edukasaun eskola SMA hotu (remata).

Durante hau sei iha edukasaun eskola SMA, hau hela dook husi inan-aman ho familia sira. Nunee buat hotu defisi tebes mai hau nia moris, defisil atu hetan orsamentu ruma hodi selu ba eskola, defisi mos atu hetan ai-han ruma husi inan-aman sira tamba defisi mos ho transporte. Loron troka ba loron hateke ba oin no ba kotuk ba selos mak hau bele atu husu ajuda no selos mak atu bele rona netik hau. Buat hotu defisi tebes mai hau durante liu husi edukasaun eskola nia laran.

Depois edukasaun SMA hotu hau, hanoin barak no hau tristi tamba edukasaun husi eskola hotu ona mai hau no hau iha oportunidade hakarak tebes atu kontinua hau nia edukasaun eskola ba universidade, maibe hau hakat ba oin hau hakat labele, hau fila fali ba kotuk hateke ba inan-aman sira hau nia laran dodok hanoin oinsa los ba hau nia edukasaun moris ba futuro. Se hau kontinua hau nia eskola ba universidade, hodi obriga ba inan-aman sira no oinsa los ho hau alin sira nia eskola. Hau hanoin atu buka servisu hodi ajuda hau nia alin sira nia eskola, hau buka duni servisu maibe buka la hetan. Hau haka'as hau nia-an ba buka fali atu tuir kursu hodi aprende Ingles no komputador, hau la konsege tuir tamba laiha orsamentu atu selu ba kursu. Nunee hau fila fali mai uma hodi ajuda deit inan-aman sira iha uma no iha toos. Maibe hau hanoin hau nia-an laiha mudansa no laiha oportunidade, no oinsa hau bele kontinua hau nia edukasaun ba moris loron aban bainrua no ba futuro Timor-Leste.

Liu tiha fulan tolu, tuir mai hau hasoru malu ho mana ida nia naran Vonnie nebe servisu voluntaria ida husi Darwin, Australia. No nia servisu hamutuk ho Timor oan sira iha distritu Lolotoe, Timor-Leste. Nia servisu nudar mestra voluntaria ida hanorin Ingles iha SMP no hanorin Ingles ba ema boot sira, no hau mos kontenti tebes ami hasoru malu no hau konsege husu ba nia atu tuir kursu Ingles tamba kursu nee la selu, nia simu duni hau nudar nia estudante ida. Tuir mai nia fo aprende mos mai hau kona ba oinsa atu halo kartu game hodi nia fo hanorin ba alunus/alunas SMP sira, no fo hanorin mos mai hau oinsa hau bele loke makina pres atu halo pres kartaun no seluk-seluk tan.

Depois loron tuir mai nia iha ideia foun ida no husu mai hau atu tuir trenamentu kona ba biblioteka iha "Sala de Leitura Xanana Gusmao" iha Dili, hau tuir duni trenamentu nee komesa iha data 14 Juliu too 22 November 2004. Treinador nebe fo treina mai hau, nia naran Fiona husi Brisbane, Australia. Iha trenamentu nee nia hanorin kona ba oinsa atu

harii no halao servisu iha biblioteka no oinsa hakerek tuir DDC, no oinsa tau spine label, no oinsa halo katalogu livru sira ho seluk-seluk tan. Durante fulan haat nia laran hau tuir mos kursu komputador basiku Word no Excel, depois basiku hau kontinua mos ho avansadu Word no Excel durante fulan rua nia laran hotu (remata) ho data 22 November 2004. Depois nee hau fila fali mai iha Lolotoe no kontinua ho servisu nebe hau aprende durante tuir trenamentu biblioteka iha Dili.

Nunee hau nia oportunidade atu servisu hamutuk ho maluk feto sira husi tasi-balu, hau iha intrese boot tebes durante ami servisu hamutuk, no hau laran-metin tebes ba mana Vonnie ho Fiona nebe hodi sira nia domin no intrese boot bele hatudu tiha ona dalan diak mai hau no hau mos iha oportunidade no intrese diak no kapas teb-tebes hodi aprende buat barak nebe diak durante hau tuir trenamentu no servisu hamutuk ho sira. Maske hau laiha experensia diak durante hau sei iha edukasaun eskola nia laran, maibe agora hau mos iha experensia diak no iha oportunidade diak hodi hau mos bele halao hau nia servisu nudar bibliotekariu ida hodi loke dalan ba alin sira nia oportunidade atu aprende no habelar sira nia matenek liu husi informasaun oi-oin iha biblioteka. Neduni hau nia oportunidade atu servisu hamutuk ho feto maluk sira husi tasi-balu hau nia laran metin nafatin ba sira no hau senti neon haksolok no laran haksolok tebes hetan experensia diak oportunidade diak atu servisu. Hau sei hein mos, katak sei iha oportunidade diak no experensia diak no barak liu tan husi relasaun servisu hamutuk ho feto maluk sira husi tasi-balu ho oportunidade nebe mak hau iha.

**OBRIGADA BARAK BA FETO MALUK SIRA HUSI TASI-BALU NEBE
AJUDA HAU HODI SIRA NIA SERVISU DIAK NO INTRESE BOOT BA HAU ATU
APRENDE FXPERENSIA DIAK HO HAU NIA OPORTUNIDADE DIAK NO VALOR
BOOT BA HAU NIA MORIS NOMOS BA TIMOR-LESTE.**